



«Яснем  
ищипа  
хулда...»

6»



Хор: Зоя Куртимова

## Ханты мира мосты айкедат

Там лапатам Ямал доватан айкед каншты, ханшты хоятат емац хатл постаса. Хольмац педа хулам тада йис, хоты ханты мир лув рут ясцедан ханшам «Дух Авт» газета кашц лапат луцатты верытлат.

Каматса хоят иншассам, хоты лув нумаслат, рут ясацан мосал ханшты па потарты, муй па руц ясцел тармал? Ванты муцева ищи мосал уйтты, мата юш хуват хатты.

Муя ханты ясац мосмаца тайты мосал, щит эдты Людмила Гурьева (Шульгина) айкед верас: «Хунты 1957-мет талн ханты мир писатель ху Григорий Дмитриевич Лазарев «Ленин пант хуват» (ин «Ханты ясац») ханты ясацан газета лэцатам порайн ястас: «Кашц мира рут ясацан айкедат уйтты мосл, щипн газетайт верты мосл!» Ванты, газета мохты муц йис потрат, моньцат, арат луцатлуд па оша пайтлуд, муй щирн муц мирэв йистэлн ус, айкедат эдты – там пора улапсаев эдты оша верлуд.

Шецк ям – ин «Ханты ясац» па «Дух Авт» газетайцалуд Интернет мохты луцатты рахл. Щиты анта туп Россия мувев арсыр мират, па хон пелак му-



Хор: Анна Ялпик

ват улты мират муц улапсаев эдты оша вердат, муц ханты ясцев уталтыдат, дэрамтлат. Ин «Ханты ясац» газетаев луцатты тумпийн хуцантты рахл. Еша ул, мосац, ханты ясацан ай кинайт верты питлуд».

Ин ляляц ята питман уллуд, ханты похлуд ищи лялясдат. Щи веран Михаил Толба ищи каматса ясац ястас: «Ма ай похем ин СВО хоца ул. Телефон хуват волац потартыты ант верытлуд. Верытлуд ки, арпелак ханты ясацан потартлуд,

ханя урацан. «Дух Авт» газетайн ёхтылытэван, рутлуд хорлуд ки кашцаллуд, похева китылылуд. Щи веран ханты ясац ант ёрэмалды».

Ханты ясац няврэматан яма уйтты урацан, Татьяна Тоярова щиты ястас: «Тунял нын конкурс «Ма яснем юрац па тацац» верыдысты. Няврэмат шецк аматсат, потардал па хордал китты верытсат. Елды ищи щиты верыдыты мосал. Щи порайн лув рут ясцел педа самдал талты питлайт».

## 55-мет тада йис, хоты яха улдацан

Хацам лапатам Семён Гаврилович па Надежда Егоровна Лонгортовцан постасцан, хоты хутъяц педа вет тад ияха улдацан. Руц ясацан ки ястаты – изумрудная свадьба.

Хус тал сайн ма там хоятцалам пидан Овкуртан уйтантсам. Щи порайн Семён Гаврилович утхот куцаа ус, Надежда Егоровна ашкулдайн рупитас. Овкуртан лув няврэмат па ун хоятат «Щаня ёх» ансамбля яха акатсалды. Арат, монщат пидан Лорвош район, округ па па вошат хуват ханты мир улапса альман яцхсат.

Инты унты аратад мира ханты улапса, щират-пицат эдты потартылдан. Няврэмлада па хилылада уйтты вердан алидылдан. Дын пиданан уйтантытэн порайн, ищимет дыпи хошаман ёхатдайн. Щи хорпи вецкат, хоят педа самацан.



Хор: vk.com/popovlegshir

Муц, аратад ханты мир, волац ханты хоятцалува мойлапса ясац китлуд. Тумтак ёш – тумтак кур! Ойца-пицаца, йисаца-нуптаца! Тураман партам хаталдан патэл унты тувалан!

Алина Тоярова ханшам потарцан

## Дорогие друзья!

Поздравляю коллективы ямальских средств массовой информации с профессиональным праздником!

Вы всегда в центре всех событий, происходящих на Ямале. Информруете, анализируете, освещаете самые важные темы и события региона. Благодаря вашему ежедневному, кропотливому труду о нашем регионе знают далеко за его пределами.

Доверие аудитории для журналиста – главный критерий оценки его работы. Ваши материалы всегда находят отклик у ямальцев, приносят вам признание и благодарность общества. Безусловно, заслуженные награды говорят о вашем профессионализме, ответственности и преданности профессии. Уверен, вы обязательно сохраните достигнутое и будете стремиться к новым рубежам развития!

Пусть каждый ваш выпуск, эфир, публикация становятся настоящим событием для читателей, зрителей и слушателей. Пусть в вашем плодотворном труде всегда будет место новым победам и достойным результатам! Желаю вам дальнейших успехов, интересных проектов и вдохновения!

Губернатор  
Ямало-Ненецкого  
автономного округа  
Д.А. Артюхов

## Дорогие друзья!

Ветераны и работники средств массовой информации Ямала!

От всей души поздравляю вас с профессиональным праздником – Днём ямальских СМИ!

Журналистика – это не просто профессия. Это стиль, смысл и образ жизни.

История ямальской журналистики началась 93 года назад, когда вышел первый выпуск окружной газеты «Няръяна Нгэрм» (Красный Север). Сегодня СМИ Ямала – это огромное сообщество профессионалов: корреспондентов, операторов, монтажёров, звукорежиссёров, дизайнеров и верстальщиков. Ежедневно они оперативно и честно рассказывают о стратегических проектах и законодательных инициативах, о событиях, происходящих в мире и на соседней улице, знаменитостях и соседях по лестничной площадке.

Особые слова признательности ветеранам – легендам ямальских СМИ, которые стали свидетелями начала эпохи становления автономного округа и заложили фундамент региональной журналистики. Теперь это дело продолжает новое поколение молодых специалистов – таких же энергичных, талантливых, с нестандартным мышлением и уникальным авторским стилем.

Желаю творческих успехов, высоких рейтингов, ярких и интересных проектов, реализации новых замыслов!

Председатель  
Законодательного Собрания  
Ямало-Ненецкого  
автономного округа  
С.М. Ямкин

Мир верат

## Рупитты ёхатты хойтат

Тад рупитты «Мастер рекрутмента» проект хуват округега сот педа йи хоят рупитты ёхтас: ветъяң педа хут – няврэм уталтыты ёх, ветъяң педа вет – леккар.

Туп ядап тад эдты катхосьяң хоят рупитты ёхтас. Ай кер тыдасян Муши вош ашкудайн Свердловской область эдты педагог-психолог рупитты питас. Ноябрьск вош леккар хота ядап пеңк леккар уса.

Там проект хуват округега хон мув эдты леккарат па няврэмат уталтыты хоятат рупитты ёхатты верытлат. Си вер хуват округ сот нядъяң педа вет рупитты маты таха пидтасяс, лапатсот рупитты ёхатты хоят китам нэпек пирыса.

Округ хоятлуд, хой рупата уятты утсийл, нётапсайт удлат: ядап вера уталталайт, энамты ёх па мушаң хоятат рупатайн уятты нётлдайт. Хой лув вер пуншты лытла, катсот сёрс солкувайн мада. Округеван 13,5 сёрс вакансий ул. Сит – йи хоят ураңан нийл рупитты таха.



Хор: ЯНАО губернатор пресс-служба

Там мосванан Геннадий Павлович Кельчин Хон мув толмацты Союз хося луңтасты питас. Сит хон мув организация, хота нэпекат ханшты хоятат яха акатлайт.

Геннадий Павлович Хон мув Союз ханшты па ЯНАО культура Заслуженной хоята луңтасал. Яма рут ясаңд уятты, ямальской журналистика хося ун онтас верты па елды туты ураңан си нэпекан юконтса. П.П. Ершов нэмпи хон мув конкурсан лауреат звание тайл.

Ханты хоятэв хув пора эдты русь ясаңан ханшам монсят, луңтарат ханты ясаңа толмацладды. Удтал сыс си рупата ай няврэмат кеша лэсятас. Сит П.П. Ершов «Мукарэң ловие» ханшам монсь, А.С. Пушкин вет монсяд: «Сорни хулые», «Солтан хон эвалт, лув юраң па веваң Кивтон урт похад па аляң Хотаң менял», «Сорни сиськурэк», «Халдыйм эвдаң па лапат урт пох», «Пуп па лув Балда нэмпи мит хоятд эдты монсь». П.П. Бажов ханшам монсьяң «Щелох тупайи», «Тутпар-Якпар эвие» па В.В. Маяковский ханшам луңтар «Муй сит симась ям па муй сит симась атом» няврэмат кеша луңаттыя хорамаңа лэсятам нэпекат этсат. Ин ханты



Хор: Альбина Тырлина

няврэмлуд антом туп русь ясаңан, ханты ясаңан лувилад луңатты верытлат.

Си тумпийн лув ходна ханты мирэв ураңан ун вер верас. Ханты мир юраң хоятлуд йис потар «Тэкаң ики ар» ханты ясаң эдты русь ясаңа толмацсалды. Сит мет волаң рупата. Муң, ханты газетайн рупитты хоятат, Геннадий Павлович па мет ям мойлапса ясаңан ясталэв. Тумтака ула, ханты ясцев елды тува, няврэмат кеша ядап монсят, луңтарат, потрат ханты ясаңан ат этлат.

## Вой велты ёх касапса этадтыса

Дорвош районан Ханты-Мурский «Товитты вер» вой велты ёх касапса манас. Хоты вой велты ёх товитты яңхлат, этадтысат. Хутмет пуш си касапса верса. Муши вош эдты худам па Дорвош йи команда кассат.

Касты хоятат касапсайдал унтан версайт. Альсат, хоты няхты вой мосятты ураңан лыс омасла, унтан хот ант тайман, лэты, олты лот лэсятсат, тохлаң вой давалты порайн, омасты, давдасты таха версат, пут кавартсат.

«Ад вантты ёхтыдысув» мет каркам па си вер уятты хоятат олаң тахая этсат. «Ант палтапты питы лук» кимет места усат. «Ну, погоди!» Дорвош курт хоятат худмет местая питсат.

Дорвош курт эдты Зинаида Васильевна Шиянова хоттэл хоятлаң пидан тохи касты яңхсат. Сит эдты каматса ясаң ястас: «Си касапсайн кашң тал



Хор: Зинаида Шиянова

туп Муши вош хоятат кассат. Па куртат эдты хоятат ант ёхтыдысат, муң олңат.

Командаеван вет ун хоят ус. Сит – Игорь ийикем, ма,

Татьяна менем, Дамир похем па Владислав Кельчин вохилдысэм. Сикем ям уйтантопса верса. Кассув, арысув, яксув, пасан опсылдысув. Кашң касты команда молты лэют лэсятты мосас. Муң васы кавартсув, шарытам худ, падам кадаң вой тутдысув, потам худ лэсятсув.

Няврэмат ураңан арсыр касапсайт верман усат. Ма нял энмалты няврэмем тохи тутдысам. Касапса етшам юпийн, ун пасан дарпитсув, шай йинсьсув, потрэмисув.

Худмет тахая этсув. Мойлапса нэпекан юконтсаюв, колонкайн па сита хора вуйм хоттэл хоятлуд тылщат луңаттота ипуляң лэсятсаюв па мойдасаюв».

**Айкедат**

# Хон мув кусяев вулды ёх семья мойдаптасды

Ун кер тыдась катхосьяңмет хатадан Пуровской районан вулды тасян яңхты Енкси па Зоя Пяк имеңан-икеңан, ветъяң тада йис, хоты яха улдаңан. Хон мув кусяйн Владимир Владимирович Путинан мойдапса ясаңан китсайңан.

Си едпийн, Москва вошан ялап тал тыдасян, Семья Тал пуншам порайн, Енкси Пяк няврэмлац па хилылац пидан хон мув кусяев пидан уйтантысат. Шоши мир улапсаед элды потартсат. Си порайн, ветъяң



Хор: ЯНАО губернатор пресс-служба

тал яха улты постаты хатла хон мув кусяев вохсалды.

Емаң хатадан В.В. Путин телефон хуват имеңан-икеңан

мойдапса ясаңан ястасды па квадроциклан мойдасды. Лын па ёхды нови вулдын лэсятсаңан. Си тумпийн, Белоруссия мув куся Александр Лукашенко, космонавтңан – Олег Новицкий па Мария Василевская па мойдапса ясаң китсат.

Округ кусяев Дмитрий Артюхов си хатл Пяк хоттэл хоятат хося ус. Лув па мойдапса лэсятас: имеңан-икеңан ветъяң сёрсаң сертификатан па донсьхопан мойдасды.

Альбина Тырлина ханшам потар



## Дохан хухатдысат, мойдапсайт вуйдысат

Хацям лапатаң нялхощъяңмет хатадан Лапатнаңк вошан нийлдет пуш «Фестиваль семейного биатлона. Новый охват!» манас. Щита Ольга Хоротэтто (Русмиленко) семьяйл пидан ши касасая пилтащийс.

Округ ловатан нэмолты вошан тамац касася хоттэл хоятат ураңан ант верыдыла. Там пуш, сусан, ищи хорпи касася каматса округ вошан верты нумасла. Кашң хоттэл верытал щий пилтащты.

Там касасая ветъяң хоттэл ко-

манда пилтащийс. Щит элды каматса ясаң Ольга Константиновна ястас: «Хатлэв вотасаң ус, туп муң семьяев пидан яма порав хайсэв. Лухаслуд пидан уйтантысув, ялап хоятат пидан пидя йисув. Команда щиран рупитсув, атма питылым верлуд ларпитсув, ияха амтатдысув!»

Там проект президентской грант Фонд па «Новые горизонты» онтасан верса. Муң кат командайн: «Ханавэй» па «Ханавэй-супер» яңхсув. Ма Лев похем пидан «Ханавэй» командайн кимет тахая этсаман. «Ханавэй-

супер» Надежда Вергун Олег похал пидан лапатметңан ёхатсаңан. Нэңат атэл хухатдымел порайн, ма худмет ёхатсам.

Ход таксарат, юраңат, яма хухатдылат. Щишан, там этам тахаята муң шеңк амтатдылуд. Кашң команда мойдаптаса: диплом нэпекат, мевал посат, кубкат па па хорпи мойдапсайт.

Ун пумащипа вутщилам ястатя Лапатнаңк вош гимназия элды улам волонтерата, Т.В. Ахатова нэман понам олимпийской резерв ашкулдайн рупитты хоятата, няврэмата яма верам рупатаед ураңан. Ши тумпийн Юлия Макарова, Россия мастер спорта нэм тайты нэңева, биатлон шеңк ванан па мосман Ямал муван тайтал ураңан, ястам хошам ясаңдал ураңан».

Тамац касасяйт онтасан, ма нумастэман, хоттэл хоятат кутлалан ямашак улты па нэгасты пилдат. И номасна, и вещькатэдна елды улдат.

Альбина Тырлина ханшам потар

Вера Лонгортова хансам потар



Хор: Ольга Хоротэтто

## Лэваса тал юш хуват ал яңхаты

Ун кер тыдась хусмет хатл унты округев хуват улты тал юшат лап пентлайт. Лапатнаңк па Пулцават вошңан кутан яңхты лаварт машинайт шималшак эсалты пилтайт.


Округеван тал юшат: Аксарка-Салемал-Панаевск-Яр-Сале, Лапатнаңк-Муши-Асов-Теги па Коротчаево-Красноселькуп лап пентсайт. Сит элды ЯНАО юш

верат туты департамент потар тус.

Каман мелка йис. Округев хуват холна вотасаң хатлат пилдат. Сишан йиңқан амарлым лотат лап полытты верытлайт. Машинайн яңхты хоятат хурыман удаты, лэваса тал юш хуват ал яңхаты.

Альбина Тырлина ханшам потар

Хор: Андрей Ткачёв



Шоши мир хоятлүв

# Няврэмат хорат ханштыя уталтал

Суматвошан Искусствайт ашкуда хот ул. Мата тахайн Светлана Прокопьевна Новьюхова 2020-мет тал вуш элты па ин тамхатл унты няврэмат сыр-сыр хорат ханшты верата уталтал. Муй ширн лув щи ашкудаялн рупиттыя питас, муйсыр тахайн уталтыйс, щи вер элты там айкелэм хоща ма ханшдам.



Хор: Владимир Енов

С.П. Новьюхова лув ёшлалн ёнтам ханты нэ сохдалн.

Мосал ястаттыя, хоты Светлана 1998-мет талн Тюмень вошан там нови турмев идпия ёхтас. Лув аңкел-ащел китамтак Суматвошан улты ашкудаялн похат па эвет уталтаман рупитсаңан. Ай эвел, ванта, хатл сус няврэмат лавалты хота тутлидысаңан. Юхатшак Суматвошан кутап ашкудайн уталтытыя лув питас. Ищи талн ай эвие аңкелн-ащелн Искусствайт ашкуда хотэда ханшлтаса. Щи вуш элты Света хорат ханшты щирата туса уталтытыя вуянтас. 2014-мет талн художественной тахайл Суматвош Искусствайт ашкуда хотан там эвие вурты диплом нэпекал пилн етшаптас. Щалта кат тал сус кутап ашкудайл хоща иса 11-мет классал сохнаптаты вушал унты па елды уталтыйс.

Щиты 2016-мет талн лув Психология па педагогика институтан искусствайт кафедра хоща Тюменской государственной университетан уталтытыя питтас.

Уталтыты верат манты порайн Светлана арсыр уйтантопсаятан па вантопсаятан ус. Институтан улты похат па эвет кутн «OkuKraft» нэмпи ай ёхдал кушчая лув пирыса. Щи тумпийн «мода» щиратн куратор юкана



ус па кашң пуш арсыр верат туңа щира па ямсыева лэщатас. Щи рупатайдал элты Светлана тамиты потартас: «Муң арсыр хорамаң думатты сохат туса ёнтсув па студенческой хатлат порайн



олаң тахайт вуйдысув. Юхатшак мувтэл мират «Этномода» нэмпи касасайт манты талатн ищиты кашң пуш муң ай ёхлүв олаң тахая ёхтыдысат».

Щиты уталтытал кутн ешаул дипломной рупата нэпекал ханшты пораяда щи ёхтас. Светлана научной руководитель

нэңал пилн ияха потрэмасчаңан па и номса ёхатсаңан, хоты ин лув ханты нэңат думатты сохат ёнттыя верытал па щи отдал онтасн диплом нэпек ямсыева елды ханшал. Ванта, практикылд манты хатлатан лув няврэмат пилн вошаң ашкудайн урокат лэщатас. Щитат верталн похата-эвета ванлтас, муйсыр ханшет арсыр мир думатты сохат тайдат. Щалта муй хорасап верат элты арсыр ханши щират сыр-сыр айкелат хоятата тутыя верытлат. Щимащ вер ураңан Светлана ханты нэ ернас па нуй сах ёнттыя питас. Катра лув нэмолты порайн ант ёнтасас. Ин яма па вещьката лувела мосты думатты сохат ёнттыя вуянтас. Мет олаңан вурты щашканат элты нэ ернаса лув самаңа катдасас па щитал айдтыева ён-

тас. Юхат ямкем хув нуй сахал утца щирн туса па хорамаңа лэщатсалды. Ёнтасты пораятн яма ант уйтты вер Светлана аңкел элты иньщасалды. Щалта аңкел молты верат яма ант ки уйтас, лув Суматвош район шоши мират культура хота яңхас па щита рупитты нэңат элты ямсыева иньщасас. Еша улды ернасал па нуй сахал етшаптасды, диплом нэпекал думаттыя сохдал онтасн лув нох щи ханшсалды.

Щиты 2020-мет талн Светлана уталтыты нэпек лувела холаптас па ёхи ёхтас. Суматвоша ёхатмалн, лув номас верас, хоты Искусствайт ашкуда хотн елды няврэмат хорат ханштыя уталтаты питл. «Щи манмемн, мет олаңан щиты нумассам, хоты еша рупитдам па па тахая айн-айн мандам. Юхат кашң ай муй ун вер няврэмат пилн рупитты щирн манэма умца йис, щи вер ураңан манэма па рупата елды улапса щирэмн иса ант па мосл», – щиты щи Светлана Прокопьевна потартас.

Ёхи хащам пораятн няврэмат хорат ханштыя уталтаты нэңев ястас, хоты ай похат па эвет пилн лув арсыр мультфильмат хоща улты вой хорасат туса нох ханшлат. Щалта щита яма оляпан нэрлат па дыел уталтаты нэңела ванлтадат, муй хорасап хорамаң войт лэщаттыя верытлат. Кашң айшак, уншак верат лув уталтаты няврэмалд хоща Светлана шеңк самаңа тайл па мосты порайн ар щирн нётл. Мосаң, щи ураңан лув хощаеда уталтаты похат па эвет арсыр вантопсайт лэщатты хатлатн куш ашкудайн, куш вошан дый туса, хорамаңа ханшам хордал ванлтадат па тухал няврэмат ищипа олаң тахаята щи питлат.

Щимащ хорат ханшты няврэмат уталтаты ханты нэ Суматвошн ул па рупитал.

Владимир Енов  
ханшам потар

## Кев сыл хантэт

### Ямал хуват Ям верат верты лапат пинтщас



Хор: ИА «Приуралье»

Округ хуват Ям верат верты лапат пинтщас, касаң нэңху СВО хоңа олты нэңхэт хаттэл ораңна, вуд пелак нэңхэт, ваят савиты приют ораңна вериттал кемна нятта.

Щимащ лапат пинтщатал алаңна ям верат верты видеоролик касты хар пунсса. Щита касаң нэңху щирл верам ям верал китта веритал па йи ёр понман коллективной ропата.

Мет ямас щи конкурс пушци «Ямал100» сайт хоңа вантта рахал.

Ям верат манты лапат сьс благотворительной акцияйт па кас верты харат мандат, щита актам охат аса СВО хоңа олты нэңхэт ораңна верам благотворительной фонд хоңа китлайт. Нэңхэт ораңна маскировочный понат, ант хорлаты щерайт, тут нядам, венс сайлаты мидат йинты мастер-классат вердайт.

Ашколайтна па хатл сьс нявремат савиты хататна познавательной урокат вердайт, щита лувилал ям верат пушци лавалда па кормушка верты мастер-классат манта питдат.

Ям верат верты лапат округ хуват олты ваят савиты приютат ув пелак олты хатлат вердат. Ваят ораңна нэңхэт щи хатл дытыт, енттытат тута веритлат.

# Касдыман яңхты ях лавалты щирна нэпекна ханссалду

Ямал мув учёныят Приуральской районна манам мет алаң исследовательский этап етсапта-сат, щита лув Кевна касдыман яңхты шоши мир нэңхэт (хантэт, ор яхат, саранат), щи холна экспертат лоңсат инщисман яңхсат.

Вуд научный сотрудник Валерий Кибенко лавты ясаңна: «Ловатдна 78 Кевна касдыман яңхты хаттэл па 25 эксперт инщиссув. Ор, ханты па саран ясаң тайты нэм Кев вурамат (рущ ясаңна оронимы) олты хуват касдыман яңхты нэңхэтна лавалты щирна нэпекна ханссалду. Итта нэпекна верам картографической основа па онлайн сервис хоңа калаңаң нэңхэт касдыты ёсат понтман олта питдат. Щи томпына



Хор: t.me/yamal\_arctic

данныят акатсу, хоты туризм шоши мир нэңхэт олапсы хоңа хайл. Вантсэв, хоты вутн яңхты нэңхэт мув вантыман яңхты нэңхэт уйтлат».

Учёныят лавты ясаңна Хон мув карта хоңа Кев вурамат, ларат па касдыман тайты ёсат шоши мир нэңхэт мийм нэм щирна ханслайт.

## Хат питарат вердайт



Хор: t.me/sakal89

Приуральской район ашколайтна СВО хоңа парам яхат ораңна хащам вер номас хат питарат вердайт.

Щиты, Охсар похал эвалт СВО хоңа лялеста манам па парта ант ёхтам Сергей Назаров ораңна мемориальной сахал ашколайна верса, щита лув хорл понтса па лув олапсэл пушци хансса. Ялап тал тыдащ 2023-мет тална антаммии йис, холъёң педа нийл талад топ ос.

«Касаң нэңху номасна

ляльна олам ях дыдаң нэңху иты век хыщта маслат. Ашколайтна щимащ зона пунсты, нятта питал нявремат элты лув мувед история ошта, ям номасна па ям ясаңна касаң СВО хоңа олам нэңху номлатыта, хой лув орциладна дыдал мас», – Приуральской район коңа Иван Сакал лавас.

Там ванан щимащ сахлат холна Катравошна, Белоярна па Харсаимна вердайт.

## Енты харат йилаптан лэщатлайт

Белояр похална луң сьс, нявремат хатл сьс савиты «Брусничка» хатна нявремат ентты харат ямас лэщатлайт.

«Нявремат хатл сьс савиты «Брусничка» хатна, ентты харатна ловатна йилап комплексат аматлайт», – Ямал мув хат верат пилна ропытты управление пресс-служба эвалт лавса.


Итта мули контракт хансса. Ропатыйт луңан пинтщадат. Нявремат щутцаты сьс, мув элты хойты лапасдал пилатлайт па йилап ентты пормасат аматлайт.



Хор: Вера Лонгоргова

## Литература лопас

## «Ясңем ищипа хулда...»



Хор: Зоя Куртямова

Ун кер тыдац хуламхоцъянмет хатадан Пулңават нәпек луңатты хотан «И всё-таки услышат голос мой...» яңмет уйтантапса манас, Прокопий Ермолаевич Салтыков каштаса. Улмад хуват, там пуш лудан, дув ярсот тада йис.

Ас нопатты тыдац ветмет хатадан «Радио Ямала» рупитты щиран хутъяң тал постыйл. Округ доват кашң куртан, кашң вошан радио хулантам хоятат нумләл, хоты ханты ясаңан туты передачайн «Вуца удаты, ханам ёх па ханам нәңат!» ястам ясңат щацсат. Щит Прокопий Ермолаевич турсыйл, мет олңа радио хуват ханты па руц ясаңан потартты радиожурналист, хутхоцъяң тал щита рупитас.

Ямальской многопрофильной колледжан уталдыты няврәмат Нина Михайловна Егерь пидан там уйтантапса ләңатсәл. Ар рупата версат. Прокопий Ермолаевич ханшам луңтарат па потар шушиет ханты, руц па саран ясаңан луңатсат. Ханты ясаң элты руц ясаң толмацсәл. Нәхты хор па вантопса ләңатсат. Җувел уйтам хоятат пидан уйтантапса.

Ханты арат арыты «Овас мувие» нәңат па «Опаль тутые» ай эвиет Прокопий Ермолаевич ханшам па ара понам луңтардал арыслад. Ай эвиет арыман ханты як яксат. «Сорни тутые» хоца нарасдыты няврәмат Валерий Григорьевич Прыжанков пидан нарасдысат.

Уйтантапса тәдые хоят ёхтыдыс. Хой дув пидәлан рупитас, хой ад щиты дувел уятсалды. Ийимел пидан энмалтам Наташа эвиет па ёх-



тыдыс. Кашң хоят Прокопий Салтыков хошам ясаңан нумалмасды. Елена Владимировна Сибарева дув элтәл верам нәхты хор вантсув. Евгений Владимирович Озелов мийм рупата хуват радио хоца ханшам турсыйл хулсәв. Павел Русмиленко дувел киноплёнка хора вуйдысды, щит кина шупиенан Прокопий Ермолаевич потартман муң ещалтәв шушал.

«Ай улмеман радио тумпийн нәмолды антом ус. Кашң хатл щит хулантман, ма нумасам: «Муй хорпи водаң хоятат щита рупитлат». «Ямал» телерадиокомпанияя рупитты ёхатмеман, ма, энамты эвие, ин щит водаң хоятдам пидан уйтантапса. Җый нәш ищи муң хорпәв ад хоятат, йи вошан улдув, йи юшат

хуват яңхлуд. Ханты, саран па ур ясаңан туты передачайт яң минут туп усат. Ведщи рупитты ёхтам хоятат щит программат хуват уталдысат. Ма шеңк палсам, молты мосаң ёвра верләм. Прокопий Ермолаевич пидан рупитты кен ус. Турсыйл шитам, айлта, ант тәрматыман мин потар ханшсаман па рупатаман иса туса тыйс», – олаң сыс рупитты питама хатлат элты Вера Васильевна Диденко потартас. Җув ин там хатл унты холна щита рупитал.

Вера Александровна Фёдорова округ санэпидемстанцияйн рупитты куца нә эвел Константин Салтыков пидан уталдыс, ин Тюмень вошан ул. Прокопий Ермолаевич элты ястал: «Ма Костя ащел елта туп вантысәм па рупитты тахайл уятсәм. Кашң хатл радио хуват дувел хулантсәм. Җув руц па ханты ясаңан потартас. Ин сәмләм лап ярдайт ки ищи па дув турсыйл моштадәм. Луңтардал луңаттыин, матты ки оцхулят, туп дый шеңк кул номас тайлат. Руц ясаңан луңатты луңтардал

ма дыпема ванат усат. Ханты ясаңан потартман, ма сәмләм лап пентдалдам па ад хулантсам, хоты дув ясаңлаң сойм йиңк иты овлат. Турсыйл юраң, хорамаң, ләпат. Тухал ишан па каман кашаңатәман, ай пирац ики шушал, матты ки ил щит ваңклапал. Туп ма иса уятсәм, щит шеңк ям па самаң хоят. Атом хоят тамац хорам, сам элты йиты луңтарат ханшты ант верытал».

\* \* \*

Ям ясңен ки яма манал,  
Хоят пәда сам ки ун,  
Иси матты хоят кеша  
Мойдаптадан мурхи сун.

Самем арийл

Тасяң хоят каншмем антом,  
Тасел тайман дув ат ул.  
Антап келәм нох ки ярсәм  
–Оем-сюнем сита ул!

\* \* \*


Юпен наң портаса,  
Кадмен ант ныда:  
Номас питды хоятан  
Самен наң тутдыда.

Мосаң, ма ант рахсам,  
Ветам ма усам, –  
Муя ант елпи наң ястасән,  
Шук лудан ант тусам.

Кашды лудан ант яңхсам,  
Атал-хатал нумасман,  
Курңадам лудан сяслы  
ант йисңан,  
Курт хуват яңхман.

(Елды па ул)  
Зоя Куртямова ханшам потар

## Тус ясаң – тус потар



Катра кулят, меңкат улам пораян, ям доват куртан имеңан-икеңан усңан. Лын хулам няврэм тайсаңан. Катңалад уншакңан усңан, итан ай, эсам лэты доват няврэм. Вой па худ велман усат. Яма усат, туп имолты пораян алаңсахат нох килмедан шияласэл: курт и оңдал мохет автомат. Ишнидал, овлад пелки олдат. Еша каншсалдал па елды улты питсат. Щиты па етная йис.

Кимет алаңсахат нох килмедан шияласэл: курт и шупал хоятлад ушмел. Хотлад матты ов элты доңам па ишни элты ким этам. Па хун етная йис, ин имеңан-икеңан эви ил вояптыя палад. Олад, худатал. Туп ата йис, ай апщел нох опсас па потарты питас: «Онтап ярпем хол эңханща, шаш ярпем нох эңханща, вайлэңкидам нох лумтащатан, молщаңлэңкем нох лумтаща».

Нох дояд па ким этал. Опел ишни хоща хухалад па вантал. Туп апщел ким этас, уна-а йис. Щалта курт кератты шушмас.

Хушл этты елпиян ёхлы ёхтас, ов пуңадан ая йис, ёхи доңас. Онтпада хуңхас. Па потарты питас: «Молщаңлэңкем нох эңханща, вайлэңкеңалам нох эңхащатан».

Онтпа ил олас. Па елды потартал: «Шаш ярпем яха ясаща, онтап ярпем нох ясаща».

Туп хушл хояс, ел холдонтас. Антел нох килас, эсаман лапатты питас. Ин эвен нумасал: «Хоя ястатя? Антем, ащем ищи па ант эвалдаңан. Апщема ясталам». Алаңсахат нох килас па апщела ястас: «Мин апщеман меңк».

Апщелан инщасла: «Муй щирани мин апщеман меңк?»

Эви ястас: «Наң атадан ал ода, хуланта».

Етан, хун ил олсат, няврэмңан ант олсаңан, хулатсаңан. Туп хушл хурлас, апщан потарты питас: «Онтап ярпем хол эңханща, шаш ярпем нох эңханща, вайлэңкидам нох лумтащатан, молщаңлэңкем нох лумтаща».

Нох дояд па ким этал. Опел па ййл ишни хоща хухалаңан па вантлаңан. Туп апщел ким этас, уна-а йис. Щалта курт педа манас.

Хушл этты елпиян ёхлы ёхтас. Хонад уна ювмал. Ов пуңадан ая йис, ёхи доңас. Онтпада хуңхас. Па потарты питас: «Молщаңлэңкем нох эңхаща, вайлэңкеңалам нох эңхащатан».

Онтпа ил олас. Па елды потартал: «Шаш ярпем яха ясаща, онтап ярпем нох ясаща».

Хушл этас, ел холдонтас. Антел нох килас па эсаман лапатты питса. Нох килмедан, курт ун шупал антома ювмал.

Няврэмңан нумассаңан, нумассаңан, муй верты. Па хонтаты номас версаңан. Аялта, ёнтты кашн, сохлан акатсалдан, ай ухда хушсалан. Антелан инщаслайңан: «Нын муй сохлан алдылтан?»

## Вурты суювие

Няврэмңан ясталдаңан: «Мин ал ёнтламан».

Хун ата йис, апщан па вош паратты манас.

Эви па пох ай ухлана амп кирсаңан, дэлапсаңан па матсаңан.

Хув-ван матсаңан, нэмолт хоят ант уятсаңан, и тахаян холсаңан па щита улты питсаңан. Пох худ па унт вой велты питас, эви – ёнтасас па апщела дэрот кавартас. Пора хашас, дын еша энапсаңан.

И алаңсахат пох, кашң хатад яңхтал щирани, холаплад па дыслад вантты манас. Етна пелакан ёхи ёхтас, па шай йинщтадан хултмас, камн суюв вохантал. «Хой щита вохантал?» – опел элты инщасал. «Щит вурты суювие. Лув алаңсахат ёхтас. Ма лувел нянян вана вохсэм. Лув авка иты вана йис. Ма лувел авкая тайты питлэм», – опел ястас.

Кимет хатад пох нох килас па холаплад вантты манас. Шуштал хуватан лув юпелан ахой шушал. Ёхлы аңкармас па шиялас, вурты суювие лув юпелан хухалад. Пох нумасал: «Щит мосаң меңк. Манэм лэты ма юпеман ййл».

Па сорашак шушмас. Туп холпал хоща ёхтас, сора омлэп верас. Щалта вурты суювие вана вохсалды, курдал кедан ярсалды па омлэпа вошкасды. Тамаш ясаң пидан: «Ун худ, ай худ веда». Ёхи ёхтас, туп шай йинщты опсас, каман тур сый щачал: «Уртые, уртые, наң ун худ велты партсан, ма наңен ун худ тусам. Холта понты?» Уртые ястал: «Олаң ватухал пара поны».


Пох ким этас, вантал, вурты суювие хухатдыял, олаң ватухал парани ун худ ики олад, тадаң тал лэты доват. Ёхи доңал па опел педа потарал: «Манэман, щи вурты суювие куртэман дэвам меңк». Опел ястал: «Щит ал суюв, хой муй меңк».

Кимет алаңсахат уртые аялта нох килас, ким этас, антапкедал ярсалды (етан нэман каман хайсалды, алаңсахат ант рохсэматы ураңан). Вой велты дыслад вантты манас. Хулдалды, имолтыйн, лув юпелан амуй йил. Ёхлы аңкармас, вурты суювие хухалад. Палтамас, нумасал: «Там хатад яна ёхи лэдаям». Сора хухалмас. Ун сумат юх уйтас, таяд юща версалды, вурты суювие вана вохсалды па аңнал элты щи юща ющтасды. Па тамаш ясаң ястас: «Тата хада, куртэм дэвам куль». Щалта ёхи шушас. Ёлн шай йинщтадан, па щи каман тур сый худал: «Уртые, уртые, наң сумат пар вохсан, ма наңена тусам. Холта понты?» Уртые нюхмал: «Щита вератты харэма вошкы». Ким этас, вантал – ун сумат шуп вератты харалан олад, лув пуңадан вурты суювие хухатдыял.

Щи хатад элты вурты суювие па ант кетамты питсалды. Лув щирадан ат ул. Щиты елды улты питсат.

(Елды па ул)

Эрнст Куртмямов  
моншам монш



## Щуццие

## Няврэмат ураңан верам

## «Титикака»

Тыдац молтас хапсас няврэмат луң сыс щутцаты унты. Ин хонна мосаң, матты хоят Ас нопатты тыдаңан щутцаты манал. Щишан тата ма вутцидам Хон Петра вошан Дворец Кваренги хоңа няврэмат ураңан верам «Титикака» нэмаң вантопса хот па щита улты пормасат элты ханшты.

Щи хотан улты пормасат щита рупитты хоятат ар тад па хон муват хуват яңхсат па акатсат. Нын сэманан ванттан ураңан, мув доватан улты мет ун нохар 7791 километр туса. Аратадан лапатьяң пормас, хол лув Книга рекордов Гиннеса хоңа доңалман улдат.

Там проект верам ху Никита Истомина щиты ястас: «Муң нумассув ант хулдыйм па ант вантыдыйм пормасат антом туп ад уйтты, муң номас версув хоятата альты. Луңан лув верытсат вантты, катдыты, эпсатты, лумтыдыты».


Кашң няврэм ай порайн «Золушка» элты монщ луңтас па нэхты хор вантас. Щита эвие хухадмал порайн тынаң кеваң курпат вайл уштас. Мет олаң ханшам монщан вайл лаңки сох элты ёнтман ус. Хун па ясңата толмащты питса, па щиран ханшам. Мув доватан аратадан ветсот тынаң кеваң вай верман уса. Итад «Титикака» хоңа туса.

Хоты муң нумаслув, солкувайт нэпекна эсалдайт, лув хлопок па лён элты вердайт. Щишан хув тайдайт, лэваса ант мордайт па ант маншидайт.

Хон Петра вошан улты Галина Макеева 2018-мет талан Дом Зингера мавнянь па кавартам саккар элты версалды. 34 хатл па 10 кг лант щи рупатая манас. 170 ишни кавартам саккар элты верман улдат. Галина ясаң элты: «Мет лаварт хот доңдал хоңа купол вертыя, хота «ВКонтакте» штаб-квартира ул. Ма лувел нийд пуш ядпа верыдысэм».

Тата каматса щита улты пормас хор понтсам. Вантыдыялан, умащдыялан. Щи музей элты верытлаты интернетан луңатты, муй па щутцаты яңхтанан щий доңтыты.

Аллина Тоярова ханшам потар



Хор: Аллина Тоярова

## Газета «ЛУХ АВТ»

Адрес редакции: 629003, ЯНАО, г.Салехард, мкр. Богдана Кнуянца, д.1, каб. 106 (34922) 4-68-63

E-mail: luh.avt@yamal-media.ru

## Учредитель

Департамент внутренней политики Ямало-Ненецкого автономного округа (629008, ЯНАО, г.Салехард, пр-кт Молодёжи, д.9, каб.708)

## Газета зарегистрирована

Управлением федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО 19 апреля 2012 года Регистрационный ПИ № ТУ72-00558

## Тираж 1340 Заказ 0571

Подписные индексы: на год – ПА700, на полугодие – ПР561

## № 16 (1215)

Газета вышла в свет 20 апреля 2024г.

Подписано в печать 18 апреля 2024г.

по графику: 16.00

фактически: 16.00

Газета выходит по субботам

Цена годовой подписки 88 руб., в розницу не распространяется

## Издатель

Департамент внутренней политики ЯНАО (629008, ЯНАО, г.Салехард, пр-кт Молодёжи, д. 9, каб.708)

Отпечатано в АНО «Ямал-Медиа» Юридический адрес: 629003, Ямало-Ненецкий автономный округ, г. Салехард, мкр. Богдана Кнуянца, д.1, каб. 106

Фактический адрес: 629007, Ямало-Ненецкий автономный округ, г. Салехард, ул. Чубынина, 39А

## Генеральный директор

АНО «Ямал-Медиа»

Зулинова

Марья Андреевна

## Главный редактор

Яковлева

Аллина

Кирилловна